

主編 黃靈庚 陶誠華

上海古籍出版社

金華宗譜文獻集成

2

主編 黃靈庚 陶誠華

上海古籍出版社

金華宗譜文獻集成

2

目錄

金華宗譜文獻集成(金華宗譜二) 婺城區委金東區委宣傳部編

張根芳輯

何

一

盤溪何氏宗譜

一

西湖思永堂何氏宗譜

七

胡

一九

安定胡氏宗譜

一九

黃

二九

東池黃氏宗譜

二九

姜

七一

鳳林姜氏家譜

七一

金

一〇五

綿塘金氏宗譜

一〇五

桐陽金氏宗譜

一二六

金華鳳山金氏宗譜

一四四

李

一五三

湯塘李氏宗譜

一五三

劉

一六九

長庚劉氏宗譜

一六九

柳

一七九

潛溪柳氏宗譜

一七九

倪

一九一

龍門倪氏宗譜

一九一

邵

三一三

嘉賴邵氏宗譜

三一三

沈

三三九

山頭下務本堂沈氏宗譜

三三九

施

三五三

墨池施氏宗譜

三五三

華峰施氏宗譜

三七九

肇峰施氏宗譜

四四〇

蘇

四四五

嶺邊蘇氏宗譜

四四五

唐

四六三

唐氏宗譜

四六三

滕

五四五

南陽滕氏宗譜

五四五

王

五五三

東湄王氏宗譜

五五三

栗山王氏宗譜

五七四

蒲塘鳳林王氏宗譜

五八〇

吳

六〇三

環溪吳氏宗譜

六〇三

漁溪吳氏宗譜

六三一

何

盤溪何氏宗譜

何氏族譜叙

周成王弟唐叔虞有孫韓安王爲秦所滅子孫散處江湖間諱允以韓改何遂爲何氏則自三代以來其爲名世也遠矣皎然翹然天下知有何之姓氏也秦漢之時裂而復合合而復渙其間四布而不可紀矣傳至唐太宗奏天下譜牒退新門進舊望左膏梁右寒微合一百九十三姓千六百五十一家而何氏亦與首稱焉今乃自梁楊州法曹遜公爲奕世之祖歷數載而自至太宰文獻執中尚書僕射忠節櫓公文定基公遂爲天下右族氏也而又有譜牒以貽後人當時海內世臣喬木之家而咸莫與之京此其所以爲名世也謹叙景定十年五月上浣刑部尚書知福州事陳宜中撰

何氏族譜叙

周成王弟叔虞有孫韓安王在位九年被秦所滅妃趙氏生太子名允遁身易姓改韓爲何遂爲何氏則是三代以來其爲名世也遠矣皎然翹然天下知有何氏之姓也秦漢之時裂而復合合而復渙其間四布而不可紀傳至唐太宗朝奏天下譜牒退新門進舊望左膏梁右寒微合一百九十三姓千六百五十一家而何氏亦與首稱焉

今乃自漢大司空汜陽侯封公爲奕世之祖歷傳至晉尚書尚之公又傳至宋太宰文獻公通判崇道公太師夢然公文定基公我明戶部尚書士宏公遂爲天下名族氏也而又有以貽後人當時海內世臣喬木之家咸莫與之京嗟夫由皇皇以來而姓氏著由居方以來而基業創得姓氏則吾人知所本得居方則吾人知所止本而不知宗是謂無親止而不知歸是謂無家無親不仁也無家不智也不仁不智何可以爲人乎哉何氏各子各孫舉無二者之非此其所以爲名世與何氏之譜所由作也于是乎叙觀文殿大學士葛郛撰

何氏族譜序

族譜名者所以譜吾族而率族之人以尊吾之尊親吾之親也族不譜則祖宗存歿之日莫之知葬埋之地不之認而吾身之所自出將餒而不分尊尊之道乖矣族屬親疎之名分不明遠近降殺之服澤不識而吾親之一體如分者將有同于路人親親之道廢矣此族之所以不可不譜也況何氏詩禮傳家簪纓繼世其尤族之表表者又可無譜牒以會求之今學士以南渡之譜繪圖列傳實傳三卷計六十條庶幾可以孝祀先祖展拜墳塋叙昭穆通愛吊昭先德告戒後人其于尊尊親親之義爲小補也爲何氏子孫尊知其所當尊而不流于所施親知其所當親而不紊于其序夫然后可以體祖宗之心而不負學士公修譜之意爰書以爲之序淳熙六年四月下浣吏部尚書程大昌撰

北山盤溪何氏重修宗譜序

譜者所以辨昭穆明世系以立尊尊親親之道者也譜其可不修歟而況北山何氏文定公倡道學于金華得配享于聖廟其嘉惠後學者天下宗之即傳之千百世固未有艾也豈爲其子孫者竟無仰止之心乎蓋莫爲之前雖美勿彰莫爲之後雖盛勿傳此續修之舉所宜急急也矧吾婺自辛酉兵燹之後祠宇焚燬譜牒無存其子孫參商散處似續無稽相視如路人者指不勝屈而北山何氏之譜獨依然無恙非祖功宗德之所遺遠歟故盤溪何氏其以譜而續修之支分派別記載釐然譜成而問序于予予捧讀之知何氏乃自十二世祖中奉大夫四八公由婺州旌孝門裡遷居北山之盤溪是爲盤溪之始祖至十三世祖伯慧公宦于臨川而文定公隨父遊臨得勉齋之真傳倡金華之道學皎然翹然遂爲海內右族氏也而又有譜牒以遺後人吾知修之而渙者可萃疏者可親庶幾昭穆辨而尊尊之道明宗派分而親親之誼篤天下莫不仰有道之曾孫思哲人之懿緒矣因不揣謏陋爰書之

盤溪何氏續修宗譜序

賞讀詩曰似續祖妣又曰以似以續續古之人其於續見世次之蕃衍歟亦于續驗發祥之有本也故周禮辨昭穆尊系世而漢唐以後遂有世譜之作第作而不續奚以明祖德宗功一世有千百世之精神千百世本一世之貽厥則釐然秩然者在續修厥功顧不偉歟而□爲北山何氏之譜歟比山盤溪何氏其鼻祖則何文定公也公隨

父伯慧公宦遊臨川得勉齋之真傳承紫陽之正嫡歸倡道學于金華厥後而王而金而許大衍薪傳金華號小鄒魯四賢遺緒天下宗焉其嘉惠後學者千百世固未有艾況爲其子孫者乎然而譜不立不知先澤之所從譜不續不知穀貽所由且遠也派別支分續之而渙者可萃商居參處續之而疏者可親吾知春秋享祀大小從公咸仰有道之幾筵思哲人之懿緒遵庭訓崇禮讓敬宗收族誼美恩明不待言矣則續修之裨益不猶大乎詩不云毋乎念爾祖聿修厥德余所由樂爲何氏子孫續譜者序也至于閱閭名家簪纓世美若執中公之弼亮志同公之文章文鎮公之忠節伯慧公之政績炳炳麟麟可以昭茲來許者譜已載之詳矣毋俟余之贅述也譜成其子孫問序於余爰述所聞以爲之序時大清嘉慶二十四年歲次己卯荷月穀旦後學郭象晉拜識

北山何文定公祠堂記

金華何王金許四先生憫宋祚之將移憂悲抑鬱卒老於窮生不出仕沒不治喪葬不起墓慨此幣幣胡不速朽嗚呼微矣白雲先生以後至元四年戊寅正月壬寅葬於婺女鄉安期里許官山其子曰元曰亨皆以罪沒於我朝洪武間因絕其系迷其墓成化初推官林沂廉得之立石表其阡仁山先生以元大德十年丙午九月甲申葬蘭谿縣純孝鄉仁山之後隴不封不樹漫無標題前知府趙鶴芟蕪攷墓纍纍叢塚不可復識而其裔寓彼鄉者亦近支也魯齋先生以咸淳十年甲戌十一月甲申葬金華縣婺女鄉望柴嶺金村之壤原墓地六十畝子孫世守之北山先生以咸淳五年己巳十二月壬申葬

金華縣南山油塘之原荆莽無端狐兔有窟商山之芝不知四皓之高首陽之薇不知夷齊之清均爲牛羊之牧而芻蕘之場也隣有豪右逐其佃甲并其圭田九石六斗山地若干據而業之三紀于茲子孫家盤溪者百數莫之能直蓋府治東二十里許亦有油塘豪歛滅其墓乃匿其碑指先生墓在彼油塘知府者不察從而是之正德甲戌春正月哉生明來知府事劉藩同知張齊通判趙大定推官姜山甫率諸生葉援陳育項復馮紀等展修祀事墓已夷且陷惟硃獨存而商生大路復兼得完碑於油塘之匿孔尚無恙也乃繩其豪於法還其碑於硃正其田於籍歸其佃甲於鄰壤伐巨石以封若堂而繚之以垣墻豎享堂四楹旁爲連薨以處佃丁規制粗備庶幾有司崇儒重道礪世磨俗之萬一而先生之存亡固不係乎是也因定墓夫一名每年追其直于鬻序輪遣教職以清明日依俗祭其墓王金許亦如之范因推其意以叙之曰自堯舜至于湯文周孔率皆五百歲而聖賢出以續斯道之傳惟鄒魯萃天地之間氣賢聖林立不可尚已其餘希世寥濶乃僅一見自孟子沒千五百年始有周程張朱兆應文明道宗鄒魯蓋問氣之再見者厥後呂東萊唱道於婺朱晦庵張南軒相與切磋講習于麗澤之會海流河潤至于文定親接勉齋之統傳諸文憲文憲傳文安文安傳文懿百里之內同門之間四賢挺生上承呂成公爲地方五鉅儒問道之士無慮數千成章者比比此又問氣之疊見者世稱金華小鄒魯不可誣也其大者極頹敝立懦廉頑如鳳凰翔于千仞四方欲快覩之而不可得味道之腴絕物之欲如蛟龍蟄於九淵天子欲識其面而不可致蓋其性命之趣長而爵祿之味短天人之理貫而顯晦之幾明德澤之滂沛不深

於義理之涵濡小康之政治不加夫大道之感通所以孔曾思孟終身不遇周程張朱不能立朝何王金許終身環堵爲是故也不然何庸衆之難退而聖賢之難進如此哉至其論大道則北山以洪範之敬五事爲明明德之謂厚入政爲新民之謂建皇極爲止至善之謂皇極有休證而無咎證有仁壽而無鄙夭則致中和天地位萬物育之謂此爲皇極之功若此者不害其爲同魯齋於易則以河圖爲先天後天之宗祖於書以洪範爲古今經傳之宗祖於詩定二南黜淫奔於春秋作發揮明大義訂大學致知格物章之未亡還知止章於聽訟之上謂中庸古有二篇誠明可爲綱不可爲目定誠明各十有一章若此者不害其爲異仁山通鑑前編自周威烈以前各爲編年穿貫春秋直遡堯舜據經考傳不嫌其爲僭白雲集詩鈔名物讀書著叢說讀春秋有管窺皆傳註所未發句讀九經儀禮三傳至于天文地理典章制度食貨刑法字法音韻醫經數術靡不該貫不疑其爲泛仰高鑽堅鉤元索隱惟欲求見聖人之止而後已然則勦庸變鼎之榮綸絳離阡之光何足爲先生增損蓋自有不隨物而化不逐運而遷不待生而存不因死而往者矣范亦嘗掇拾行實疏于朝請得暇食孔子廟庭不知輿論僉同能有成否茲因祠堂訖工刻石識之學宮牧敲爍火想不能崇我先生道骨矣正德乙亥夏六月朔謹記

唐揚州法曹何公傳

公諱遜字仲言梁天監中作揚州法曹廨舍有梅花一株公吟咏其下後居洛思梅因請再任及抵揚而梅花方盛對花彷徨終日公與

陰鑑俱以能詩名號陰何又與劉標並有重名號何劉公強學博敏超絕一世肇自載籍孔墨百氏大史所錄俚聞野記延及荒外陰陽鬼神細大萬殊一載以身至于律令老吏所疑故舊章在廷不知有而於公歸如得師公接人謙和恭敬未嘗疾言遽色如陽春之溫煦如甘澍之膏潤云翰林學士承旨中書門下平章事浦城章得象撰

宋太宰榮國公追封清源郡王何公傳

公諱執中字宗堯又字伯通神宗朝舉進士琬之裔孫登進士高第調台亳二州判官知海鹽縣有異政以母憂去寓蘇州比鄰夜半火公拊母柩號慟有頃火卻徽宗時累官至太宰封榮國公卒謚正獻追封清源郡王子志同姪志崇皆擢第公氣仁色溫寡笑言言若不能出口及見義慷慨辦且強也方微時已數劇切上官無顧避及老益自強守所聞於古不肯苟隨以故齟齬不以易意公事親孝持己約與人交盡其義其於恩尤至也治人居官一以忠厚不矜智錡名可謂篤行君子矣其家食不足而俸錢常以聚書至老讀書未嘗一日廢也爲人磊落明白推誠自信不爲防慮至其屢見侵害皆置而不較亦不忿於胸中居家不問有無喜調宗族暨卒家無餘財公天資冲澹凡聲色貨利常情之所不能嗜者皆漠然不一動其心非誠于無欲能之乎紹興十二年十一月日資政殿大學士樓炤撰

浦江何公傳

公諱敏中字元功世家太末其遠祖延壽始來遷浦陽公自少學易恐飲酒廢事終其身弗御與梅執禮交甚洽每有疑難相與論定之

郡縣察其賢將以八行及遺薦辭公素仁厚由太學時同舍生方立卒公鬻行橐持其喪歸隣州寇起將壓境公攜家避山中比鄰從者以百數道遇擁刃來者衆相顧泣且死公出告其酋酋大呼曰此浦江何公也吾昔爲尉所縛藉公一言而免是嘗有恩于我者不可害不可害即命兵護之紹興八年九月望宗正少卿禮部侍郎鹽官張九成撰

宋尚書右僕射何公傳

公諱櫓字文績與兄棠弟桀號三鳳致和五年登進士第靖康元年累官陞尚書右丞以主戰守與唐恪耿南仲不合罷爲開封尹二年公與吏部侍郎李若水扈從欽宗復如金師李若水死之淵聖皇帝至燕山金軍營公不食而死時年三十有九死之日口吟詩云人生會有死遺恨滿乾坤公在政府時被帝非常之睠蓋嘗以誠實不欺稱公而公以經行氣節立朝君臣之間相與以道而相知以心平生大節可謂以道始終浩然而無愧矣自古鉅人門戶一再世凋者甚衆惟公兄弟世數益遠而家法益峻求之故家能如是者少矣淳熙十年四月既望集英殿修撰知福州軍州事趙如愚撰

宋授史館校勘兼崇政殿說書承務郎何文定公傳

公諱基字子恭婺州金華人父伯慧爲臨川縣丞而黃幹適知其縣事因見二子而師事焉幹告以必有真實心地刻苦工夫而后公悚惕受命于是隨事誘掖得聞淵源之懿平研精覃思心易氣以俟

其通未嘗參以己意朱熹門人楊與立一見推服來學者衆嘗謂爲學立志貴堅規模貴大充踐服行死而後已公確守師訓故能精義造約王柏既執贇爲弟子公謙仰不以師道自尊柏高明絕識序正諸經宏論英辨質問難疑或一事至十往公終不變以待其定公淳固篤實絕類漢儒雖一本于熹然就其言發明則精義新意愈出不窮有文集三十卷而與柏問辨者十卷趙汝騰守婺延聘請講辭不就復首薦于朝又率命從官列薦通判鄭士懿守蔡杭楊棟相繼以請皆辭辭景定五年詔舉賢特薦公與建人徐幾同被命添差婺州學教授兼麗澤書院山長力未竟理宗崩咸淳初授史館校勘兼崇政殿說書屢辭改承務郎主管西岳廟終亦不受也卒年八十有一國子祭酒楊文仲請于朝謚文定所著大學中庸發揮大傳易啓蒙發揮通書近思錄發揮賜進士及第司封郎官兼充國史實錄院校勘淳安逢辰撰

處士樂之傳

行華八十九諱秉成字樂之盤溪之處士也聰明俊偉容貌超羣終能自立其生平行誼存心以誠處己以敬制事接物以仁以義謨猷保釐都邑德望表正于鄉邦且孝友敦篤爲榮七九五公之次子事二人常懷明發處昆季間怡怡如也人雖往而今慕其風者猶嘖嘖人口間若夫憐貧恤寡排難解紛特其餘耳最可羨者琴瑟斷絃而終身不續鞠子惟二長曰盛選次曰盛進俱延師授業雖書志未售而儀型有方古稱紹聞之烈皇矣昌後之德弗替盤溪之處士其庶幾乎時龍飛雍正七年歲次己酉孟冬之吉邑庠生王大成拜撰

捐贖何文定公墓田序

世稱金華小鄒魯蓋天地間氣所鍾文以載道道以人傳其間何王金許四賢林立並大有功於濂洛關閩以兆應文明者也迺文定公上承呂成公道脉親接黃勉齋之統爲文憲文安文懿之領袖蓋其發揮經傳羽翼賢聖樹縫掖之楷模立後學之津梁元氣蘊盎表裏純白難進易退者得謙之吉確乎不拔者守乾之潛斯其人爲奕世不朽之人自應建其業爲奕世不朽之業予心竊向往者久之己未秋自顏烏調任以來即慨然有展修祀典志既而詢其家則世於盤溪訪其墓則落於池塘攷其碑則得於有明太守之建祠堂記先是文定公之歿遺有墓田九石六斗以供祀事乃悉併於豪右厥後明季劉公來守是邦繩其豪清其田釐而定之且爲繚垣墻豎享堂規制森森功成勒石識之學宮曰世世子孫無相害也迄今代遠年湮風微人往而當年劉公清釐之美意又僅存其半焉嗟乎祀田之失固無足爲先生增損而漸歸磨滅獨不足爲子若孫歆戲乎哉有婺之孝廉郭君有泓率同紳士具呈於予予奮然起曰曾是先賢所留遺而忍聽其豪右侵削乎要其失產例應清救其購贖利用捐助以是詳請各憲蒙學憲鄧公極加獎勵爰捐清俸爲都人士倡予也竊附於其後願以告夫有志之士共勸厥成者夫名賢鉅儒拯頹救敝在世相遠地相去者儒立頑廉聞風靡不興感況爾邑都人士生同方居同里涵濡北山先生教澤於數百年之久者可無同心竭力以維持而保護之與倘或捐贖之後助有贏餘則建享祠廣墓田紀功勒銘永垂不朽諸君子亦與有光矣獨予一人之力哉誠如是將見

崇先賢之祀典明德惟馨綿春秋之禴嘗籩豆有踐庶幾遠不愧明
太守建祠勒石之精意上不負督學憲崇儒重道之盛心也夫是爲
序乾隆六年季夏月中浣吉旦賜進士出身文林郎知金華縣事後
學盱江程煜拜撰

飲賓華六十四公贊

從來諸福之集善爲之基所謂善不外乎存心處事持已待人而已
嘗見世人以涼薄居心而公存之以忠厚世人以慢易作事而公處
之以精詳人之持已也驕而肆公之持已也謙而約人之待人也私
而刻公之待人也公而恕至於事親克孝御下克寬教予克勤自奉
克儉則尤出於公之天性而非勉宜乎鄉評重之有司聞之出自名
賢世胄薦爲盛世嘉賓令終高朗而爲閭里之榮者也乃爲之歌以
贊之曰惟公之醕厚兮天降之祥俾彌爾性兮眉壽且康蘭蓀雀起
兮穀似鸞翔德尊族黨兮望重鄉邦後與爲裕兮前與爲光福非倖
致兮主善爲常余愧不文兮有尚歎乎稱誦之詳眷晚生金鴻功
謹贊

西湖思永堂何氏宗譜

西湖何氏家乘序

譜其來也尚矣上之可以決同姓同族之是否次之可以辨尊卑親疏之等殺下之可以知盛衰升降之大數不有此則無所考矣余家世何氏聞之先世有曰原合州人氏寓居處之龍泉商於娶之金華一父而生三子有曰監簿者焉有曰秘監者焉有曰將仕者焉此吾何氏之所從出也吾考之家世之族譜始自十世祖而於今十世而上其詳不可得而聞也文獻不足故也足吾能證之矣淳祐年間東峴同宗何連州以吾族爲族凡合族之子若弟名諱行次悉從而書之譜牒連州初心以無嗣而欲命立吾族弟祖父不允其請乃止設使連州無嗣娶之同姓者甚多矣何姓拳拳於吾族耶是豈無所見而然也其亦有所聞於先世的傳之說而然也惜乎吾之先世不能筆而錄之使后之人有所考也今夫十世而上姑爲史之闕文以附春秋之列將有俟來者而考焉十世而下支分派別若綱在綱有條而不紊吾族孰是孰否孰尊孰卑孰遠孰近孰盛孰衰孰升孰降盡在吾目中一見而可決矣夫以吾族派之盛且多然登仕版者不多見焉豈先世不知詩書之利乎我聞在昔繡川清肅劉公提干乃吾高祖之婿也吾曾祖之親姐妻之也遂使先祖就學焉劉公以己之子不如吾先祖之好學不復招師而以吾先祖嘗有志於教子競無所成就先君紹述先志銳意教子吾長兄素有受道若資惜乎弱冠

而天中道而廢吾先兄不忘先父遺言教余兄弟幼則招師教導長則從游四方俱通舉業於郡庠則亦嘗補中矣於鄉舉則亦嘗試中亞榜矣又以鄉舉不利遠游京庠則亦嘗聯中矣天假機會免解侍省之思可以例及奈時异事殊爲之奈何余兄弟嘗以未能成名爲憾所幸天未喪文吾道復春朝廷重士設立戶計而余兄弟名登仕籍子孫亦得以列其間而不於農工商賈之列僅可免儒冠之誤矣詩書之學未嘗負人不在其身則在其子孫吾之子若孫者當念吾詩書開荒之不易篤志好學不以詩書之效遲速銳鈍而二其心學之不已必有顯者誠足爲族譜之光足爲吾之所願望使無志於學超向日下降而與編戶爲伍豈余之所願望載昔人有云將相本無種男兒當自強又云不學則公卿之子爲庶人學則庶人之子爲公卿爲吾子若孫其勉之戒之至元三十年癸巳秋九月九日第十一世孫溥拜首謹述

何氏宗譜序

何氏譜譜何氏之族也何氏世家金華之上何而上何之何有東西兩族焉是譜則西何之族也西何之先徙自處之龍泉系緒悠邈莫考其始徙之代序然世以士業承傳迄元而大盛嘉興路錄某始念族蕃而不可以無譜也乃自其六世某府君以下譜之以傳人國朝族益蕃衍學錄介孫字誠之又續修之未及脫稿而終迨今二十年而蕃衍日益加誠之介子豹又命其從子携同其族而書之通若干世若干人書成俾恂序之恂乃誠之婿也幸以掛名譜中義不空拒嗟乎世之稱望族者莫不以爵位崇高衣冠炬耀爲可榮而不知詩

禮相襲德義迭著者之爲貴或以己宗不顯而妄援他族者何其謬哉夫爵或微幸可至苟不循道則獲戾造物而族踵衰敗者多矣彼以德義爲尚者身雖隱約而任職於天者甚重往往后裔由之以昌盛此天爵人爵所以分其二致一以微故隱約之后多顯榮而顯榮之后多凌替隱約及致光耀者固由迓續先猷之有人也在乎自懋而已曷以他族爲羨哉恂登何氏之門獲得外舅伯仲間仰其令德之盛稽其自高曾至學錄以來世爲峻儒皆以盛德淑其鄉人垂裕后昆蓋其來也遠故蕃衍若是速令能繼繼承承而也方妙年益推宗學保障乎宗黨尤志於繼述此世所謂德門令族彼見彼見他驟倅來援矣其有援乎人哉詩曰無忝爾所生凡令登名是譜者尚觀感而延引之雖不期乎顯榮而顯榮臻矣是爲序十五世孫仲本重修

何氏家乘后序

婺之郡城東南之十五里地名上何其地有東西二何其西何宗兄諱捺字則存者乃學錄五世孫也稟性穎悟精通四書兼明詩禮書三經尤精於小楷書士林尊稱之曰存齋先生躋足不顯縣宰龔矣聞其賢以禮請館解家訓其弟子庠序諸生員多師仰之早年通畫家譜葩蔀司訓姓俞諱恂者從姑夫也一見家譜而美之以爲前序其譜未遂鋟梓而宗兄亡歿家貯因火以失經今若干年矣令從弟仲本即學錄教諭五世孫也知乃物本乎天人本乎祖無譜可乎惓惓搜訪遺稿續編譜圖則曰何氏家乘將以示敬之再三如木之有根根之有杆杆之有枝其花其葉暢茂莫不由其根本也其九世祖

諱軾者葬本里上演谷園其六世祖諱字葬所遺稿無有世遠悠邈不能考也只書第行如蠶之抽絲而不紊累積可成緞疋若子孫之蕃衍也考之譜九世祖祝諱天澤自東陽贅於上河陳氏之東何皆始九世祖知爲兄弟雁行速令伯叔尊卑不敢逾越吉凶吊慶無違雖譜之別而分之存且居之聯而會之數豈偶然哉故爲之后序俾其子孫勿替友愛之云爾時宣德己酉春二月

何氏重修族譜序

金華城東去近二舍許有地曰上河何氏世居焉族屬蕃衍子孫彬彬有十六世孫克麗者克本邑椽一旦詣邑庠語予曰吾宗始於處之龍泉后客於娶之上何取其山水之勝遂卜居焉其遷徙不常而譜牒無記至十五世孫有曰則存者吾伯父也念先世邈遠恐昭穆失次遂縞集界畫以爲世系俾傳於后未遂刊行而先棄世有叔仲本讀書好士知尚禮義遂令搜訪遺稿依次謄錄成帙請校於宗伯士恭先生重加考正復序其后命工鋟梓始克完美而比鄰不謹於火竟遭回祿之厄或棄或蕩散無存幸有叔仲本仗義於烈焰中收其家廟神主凡若干位謹藏於室余悉灰燼重可慨也而叔仲本不忘其初仍命介子聰忠重新編次善謄鋟梓使前人之志不墜而仲本之功亦煌然而克完亦願征先生一言以光予之譜焉予謂之曰凡人家不可以無譜無譜則親疏無別尊卑失序喪不吊婚不賀相如途人者比比皆是也又可謂之世族舊家者乎令叔仲本拳拳有志於斯始遭於厄而未遂其願今復施財命工完美其事則見其能從宗族爲重而不吝其貲以譜牒爲貴而不計其費誠可謂輕財而

尚義者也始見肇乎公之心終見完乎公之乎其有光於世族者大矣哉俾后之人視斯譜者豈不慨念前人之用心者乎茲因克麗之請故書此以紀其重修之年月云時正統六年歲次辛酉閏月望日金華縣儒學教諭文江張用序

又續修何氏家乘序

嘗謂譜之有關於世教也甚大文節公有曰十年不修譜謂之不孝又曰仁義孝子必以譜牒爲首務此譜之不可不修非無所稽而然也余考西湖何氏宗譜自正統辛酉歲十五世孫仲本續修已后迄今萬曆庚子歲蓋二百余年矣歷世既久生齒日益衍其生辰年月日時雖有記生簿僅存而卒葬婚氏子女之類尚未登載於簿內失此不修則數傳以后寧不幾於泯歿而無聞乎第二十世孫榮深爲此懼不憚劬勞凡於譜所當錄者詳詢考證重加編葺歷數載而譜稿始成出示諸衆僉曰是譜之作信可法而可傳矣不加以鉅梓何以取重於當時而啓信於后人也哉於是請余以掌史之任任之不敢以不文辭凡譜所不可缺者補之舉其要也譜之所不必書者略之刪其煩也舉要刪煩而節目具備乃匯編成帖分爲二卷而譜始就緒矣由是觀其圖而支派昭然觀其傳而長幼尊卑不紊觀其文而祖先之懿德雅行可考噫若榮者真可謂仁人孝子而大有功於先世者矣夫豈曰小補而已哉時萬曆二十八年歲次庚子孟冬月望日烏邑庠生少溪金守性撰

何氏重修家譜叙

孝莫大乎尊祖敬宗故家器未造先造祭器居室未營先營祠廟況乎譜系攸關所以溯本原叙昭穆詳支派睦族姓烏何久遠而弗修也哉何氏祖居金華上河西河之先徙自處之龍泉系緒攸遠莫考其始遷之代序其顯祖則宋徽宗時有諱執中者封榮國公兼端明殿大學士又有諱植者謚文會公任招討使即西河始遷祖也有歷官朝散大夫樞密使者有歷官朝散郎徽州通判者有任尚書郎贈朝散大夫者有加中奉大夫者有諱基者號北山與王金許同號四先生共承呂成公正學之傳至今頌述殂豆不絕入明洪武時有諱仕宏者升至戶部尚書卒於官殆不可殫述迨其后代相積善不乏仕宦世稱禮讓之族江南著姓今何氏子孫振振繩繩繁昌幾至數千如隆冬松柏當歲寒而愈茂豈若朝華之草至夕而即憂其零落哉坦時代綿遠譜之不修恐親疏無別尊卑失序其究也喪不吊慶不賀相見如途人者比比皆是也其可謂之世家舊族者乎前至元三十年有教諭諱宏有學錄諱溥共敦禮義以興起教化爲己任嘗慨然於家之不可無譜於是一修之於前及正統六年裔孫仲本者又再修之於后至萬曆庚午年蓋二百余年矣二十世孫諱榮者深爲此懼以爲歷世甚久生齒既多不容失此不修乃起而三修矣今逢大清鼎建又閱四十余載何氏宗長諱鼎新諱其慧等惕然念之譜牒之不可不纂修也於是譜之缺者補之必舉其要不必書者略之當刪其繁舉要刪繁而綱舉目張由是觀其圖而支派昭然也觀其系而尊卑長幼井然也觀其文而祖宗懿德善行又燦然也此一

役也遲之至今九十年矣重加修葺不憚勞費而煥然改觀可不謂仁人孝子而大有功於前人后裔者豈非文會公之靈所感也哉是真知務之緩急而可法可傳竚見后代之必興也其裔孫諱騶者與余世契爲深知伊族之始末乃囑序於余故不辭而敬爲之序時大
清康熙二十七年歲次戊辰清和月長山外翰沈麟趾頓首拜撰

西湖何氏重修宗譜序

古婺之東大江之南西湖何氏推巨族也其世系源遠而流長其子孫日蕃而日衍唯有宗譜以聯序之斯尊卑長幼秩然其不紊則譜牒之傳越數十年間必不能已於重修有事矣夫譜之修固不必近而至於數亦不可遠而失其疎苟歷年近而欲修則族人繁纂訂之任非幾日月所能勝勢則繁者益繁而且存沒不齊徙遷不一欲續而修其勢愈難而其事愈不可緩使非有杰出之人首捐重貲以爲之倡練達之輩斂財糾工以爲之輔亦烏能聿觀厥成勝任而愉快耶考前西湖何氏譜自康熙戊辰歲續修后歷乾己丑已逾五十八年矣今有廿五孫諱先機者捐重貲爲首倡余例照現在丁斂文以襄厥事延請義邑名師齊侯氏以纂訂祥里旭謙君副之選舉族之老成有若者董其事后生明達者監其工自乙丑歲仲春伊始至丙寅冬越二寒暑而告竣嗚呼歷年其遠矣子孫其繁矣譜工其大矣至此告成尊卑長幼之倫秩然其可觀則首倡之功董事之勤監理之勞亦云美亦余母西湖何氏也是歲余又忝在西湖之西席因知何氏重修宗譜之甚悉諸翁向余而丐序焉余愧辭至再因思余誼則實也而分則甥也拒敢遵命遂不揣鄙俚而樂序之以垂后之

繼此而重修者時大清乾隆十一年歲次丙寅季冬之月穀旦烏傷后學眷晚生陳濟川薰沐拜撰

文定公行實

何基字子恭承議郎伯慧子也賦性端凝夙有遠志少從鄉先達陳震習舉子業課程若不得已而潛心義理之功居多既冠侍其父伯慧爲臨川丞適勉齋黃干爲令遂師事焉干教從必有真實心地刻苦工夫而后可基悚惕受命始聞伊洛淵源之懿臨別告以熟讀四書使胸次浹洽理道自見遂終身服習頃刻不忘一室危坐萬卷橫陳每於聖賢微辭奧義有疑而未釋者必平心靜氣勿忘勿助待其自然貫通不立立異以爲高不徇人而少變克其所知而反之於身無不久踐其實船山楊與立一見推服由是學者爭趨焉凡請問者無不竭盡而與之言嘗謂爲學立志貴堅規模貴大沉踐力行死而后已論讀書讀易及洪范大極定性書四書語錄皆有發明蓋其確守師訓故能精義造約王柏既執贄爲弟子基謙抑不以師道自尊柏高明絕識序正諸經宏論英辨質問難疑或一事至十往返基經不變以待其定嘗曰治經當謹守精玩不必多起疑論有欲爲后學者謹之又謹也平生無疾言無遽色無窘步無叱喝聲不匿情不逆詐不伐善不較利害事父母其盡孝受之道事兄長盡其和孺之樂處族姻崇仁厚之風交朋友盡忠告之責凡聞一善言見一善行喜於色若己有之或朝有闕政四方有警輒惻不樂至忘寢食其爲文溫潤融暢其爲詩從容閑暇作字勁密世傳柳法隱居求志不願人知真無愧古人爲己之學郡守趙汝騰蔡抗楊棟相繼聘主麗澤

書院皆辭不就景定五年與建人徐幾同被特焉添差婺州教授兼麗澤山長力辭度宗立授史館校勘兼崇政殿說書又頒詔札敦勉備至辭益力特改承務郎主管南岳廟使食其祿以遂高志然亦經不受也咸淳四年冬十二月卒年八十一平生不著述唯研究考亭之遺書所編有大學發揮十四卷中庸發揮八卷易系辭發揮二卷啓蒙發揮二卷太極通書四銘三卷有近思錄發揮未校正語孟發揮未脫稿併文集三十卷居北山盤溪之上學者稱爲北山先生國子祭酒楊仲文請於朝賜謚文定度宗皇帝撰文定公語才德真備壯我國柱觀爾儀容心應天地定公所作吳巽之石菖蒲詩菖蒲綠茸茸偏得高人憐心清境自勝何必出澗邊節志葉愈勁色定姿不妍堂中賢主人與汝俱瀟然

華四府君傳

府君諱富字天錫別號玉泉體貌魁梧胸襟豁達才華卓犖秉性淳厚振家聲而克光前烈嚴庭訓而啓佑后人富而好禮壽而能恭郡邑諸侯頻加優敬合郡薦紳莫不推重而樂於交游誠我宗祖積德累世所生而子孫千百祀所利賴者

富三府君傳

府君諱榛字廷茂號爰山孝千親友於弟仁而好施勇而好禮總理家政而勞瘁弗辭倡卒御侮而安危弗計玉泉太祖之大有造於后者皆其佐力也則凡子子孫孫沐恩於玉泉太祖者動勞乎

富三十一府君傳

府君諱棟字廷隆號石溪孝友性成仁厚天植幼習舉子業后厭其煩碎遂更志而刻意潛修侍親病湯藥躬調執親喪哀燬踰禮散谷以賑窮民舍棺山以埋暴骨難以數計捐租以存鬻妻給米以拯溺女非止一端府主設立義倉而患無積貯即上谷數百石以爲一郡之倡率邑侯大開賑濟而病於不斷則代賑二三圖以鼓四境之善良縣請總理丈量士民說服道延商確利弊市野蒙恩大請鄉飲四居上賓五錫冠帶毫無色喜名行首列憲綱爲通郡之領袖匾額攢聚門庭誠兆庶之奇觀如督撫溫蕭滕常如按院王謝馬李傳唐方李傳唐方李如學道陳伍如守巡道蒙林張吳如府主葉黃周張王睦如縣主張詹陳汪方熊劉幣帛頻加誠爲異數優崇迭至迥出常規或以耆德三賓獎或以仁孝德獎或以尚德善士獎或以祝擬華封獎內各有褒揚語不能具載中有云如棟者匪直一郡邑之耆英實乃清朝之嘉瑞又有云此向出之英大有光於聖世者現今九袞有余鶴發童顏樂善不倦兩經闔邑士大夫兩學生員四鄉約正圖地保舉呈現奏請建坊旌表尚有待焉又蒙邑侯熊批照印信乎本以待身后立傳登誌

碧峰公傳

公諱文富別號碧峰行淮三百九性明敏英才卓越有風度人服其宏雅弱冠遊京都紳佩之士咸景附焉天部溫公慕其才聘入堂侯果稱職聞諸朝欽授京衛經歷惜年不永未建勛業娶劉氏生一子

早逝聘娶袁氏普彥伯公之裔也行兼四美禮爛鐘郝相厥夫子黽勉同心生一子夫亡柏丹自矢撫子成立以壽考經令季子之次男紹儀少年有志探討六經善潔孫吳學精步騎射舉禮部儒士若兄乃弟咸成令器孫枝綿衍正未可量天之所以報施亦云厚矣時康熙二十七年仲夏月乙卯科中式舉人雲間孫婿張士紘謹述

正陽公安人余氏傳

余氏系伯暹號正陽行淮四百公之原配按安人出自名門其父爲先朝將領鐘禮郝法素所熱聞咏雪時英英有丈夫氣及笄歸何善事舅姑黽勉同心相厥夫子數年之間舉男者再一時稱賢內助者咸翕然歸之年二十七而夫亡二子長天祿次天全幼稚艱窮迫苦志撫孤俾有成立以報所矢后守憲徐公廉知其節特給匾旌獎以爲世風歷年八十有二以壽考終人謂其壽不永則節不堅節不堅則壽不貴今壽與節兩不可及是天特假其身以爲闡范也當時稱譽如是詳邑乘中時康熙二十七年歲次戊辰蒲月之吉鄉進士張士紘謹述

北山先生文定公墓銘

先生世居盤溪卒於咸淳丁未十二月戊辰距其生淳熙戊申十月乙卯也墓在縣西三十里殿青山循里鄉油塘之原墓碣墓田爲土民所奪正德十年郡守劉日采者謁祭爲創祠宇是不可以無銘也顧乃稽其所聞者而爲之狀先生諱基號北山謚文定公父伯慧太父松王大父翼道自幼以文學稱比長以繼往開來自任與魯齋

王先生仁山金先生白云評先生講學於麗澤書院當時學者皆師仰之如泰山北斗宋景定聞其賢舉爲殿講非先王之法言不敢言非先王之法行不敢行誠可以匹體於伊傳周召而與濂洛關閩相并稱者矣欲云金華文獻邦皆因先生而得名而后有四賢祠以祀之者亦因先生而設立者也是宜爲之銘銘曰道學名世世能有幾惟吾婺兮淵源相繼時正德十年郡守劉識

濟五十八府君暨安人邵氏合葬墓志銘

府君姓何氏諱寄華濟五十八其行也父諱項玉行淳五十祖諱釋貴行連二十六曾祖諱宗惟行演三十六皆畜德勿仕第九世祖諱仕弘教諭者也府君享年八十有五曰惟疾卒於萬曆辛巳三月初六日子時距其生弘治戊午九月初六日亥時也安人享年七十有四先府君八年而卒實萬曆癸酉十月二十五日距其生弘治庚申八月初四日也安人卜葬於西力畝府君蓋合葬也冢子曰增圮者以考妣之葬已久墓未有銘抑何以彰其德於不朽故具其狀而囑之子曰今當修譜之時而先德勿彰則不孝之罪甚矣乞接聯書之以掩諸幽予乃按其狀而爲銘府君志向高邁素行端莊凡綱常重務皆其所獨任者慮祠有不建則宗族渙散乃於嘉靖戊申年率衆建祠而衆心不一則所志勿就僅留基址一所是亦爰禮存羊之意也復萬曆丁丑年重倡協議而祠事賴以告成此皆府君創始之功也鄉邦仰望士林推重本邑大尹公強聞其賢拮圖保長公正不阿而人皆服從及理家政生殖有道而富甲一鄉配安人邵人婦道克全閨門中稱杰出者生子男四長曰增圮即請銘者次曰增淮三曰